

Objek Undang-undang Islam

Memelihara Lima Sendi Rukun Hidup Manusia

Para ulama usuluddin telah menekankan, bahawa tujuan undang-undang Islam ialah memelihara dan

mempertahankan lima sendi-sendi rukun yang diperlukan manusia di dalam hidupnya. Lima sendi atau rukun di dalam hidup yang dimaksudkan itu ialah:

1. Memelihara keutuhan agama.
2. Memelihara keselamatan jiwa raga.
3. Memelihara kesihatan akal fikiran.
4. Memelihara kesucian keturunan.
5. Memelihara keselamatan harta benda.

(Oleh: Sabri Salamun – Kaherah)

Satu hal yang sama-sama dirasa, bahawa lima sendi atau rukun yang tersebut di atas, sudah tentu tidak boleh dipisahkan dengan kehidupan manusia sehari-hari, selagi manusia itu masih suci tujuan hidupnya, muh aman damai dan makmur. Bila manusia cuba membelakangkan lima sendi rukun hidup itu sebagai dasar hidup aman damai, maka tentu sahaja tidak hairan, kiranya nanti akan mengalami suasana yang tidak stabil dan normal di dalam mengimbangi putaran zaman dan perkembangan hidup.

Untuk tujuan mencapai matlamat hidup yang sihat, aman damai, jauh dari ancaman dan ugutan, untuk tujuan mencapai kesenangan hidup yang lumayan dan bahagia, maka Islam lahir dengan undang-undangnya yang lengkap dan sempurna untuk menjamin dan mempertahankan lima sendi atau rukun hidup manusia di alam jagat ini.

Ditinjau dari beberapa segi, maka ternyata bahawa undang-undang Islam

mengandungi cukup dengan peraturan-peraturan tata tertib dan susunan perjalanan mengenai urusan agama dan dunia. Dari persoalan manusia kerdil kepada persoalan Tuhan yang Maha Besar, dari persoalan manusia individu kepada persoalan masyarakat, dari persoalan material kepada persoalan spiritual begitulah seterusnya, dari persoalan *local* (tempatan) kepada persoalan *international*.

1. Memelihara keutuhan agama:

Diturunkan Islam ke alam dunia dengan tujuan untuk mengatasi *problem-problem* dan kekacauan-kekacauan yang dihadapi oleh manusia, untuk membimbing mereka ke jalan yang benar, untuk memperkenalkan nilai hidup dan mengajak manusia seluruhnya membawa hidup yang bererti untuk menyingkap tabir kesesatan dan untuk mengenal dari mana asal mereka akan kembali, di samping untuk menanam rasa hormat menghormati di antara satu sama lain serta untuk melakukan kebajikan dan menciptakan kemajuan.

Islam menentang dengan keras akan

gelagat si kaya raya menindas si fakir miskin. Islam melarang si kuat memeras tenaga si lemah, dan Islam memandang jijik kepada fahaman beza membeza asal keturunan dan warna kulit.

Malahan Islam mengajar manusia agar hormat-menghormati di antara satu sama lain, tanpa memandang warna kulit dan asal keturunan darah, tanpa memandang tempat dan daerah. Islam mengajak manusia seluruhnya supaya di antara satu sama lain tolong-menolong dan bergotong-royong bagi membina kehidupan yang aman bahagia di dunia dan di akhirat, sebagaimana firman Allah dalam surah al-Mā' idah ayat (2):

“Wa ta‘āwanū ‘alā al-birri wa al-taqwā wa lā ta‘āwanū ‘alā al-iṭḥmi wa al-‘udwān.”

Ertinya: “Bertolong-tolonganlah kamu atas jalan kebaikan dan takwa dan jangan kamu bertolong-tolongan atas jalan dosa dan bermusuh-musuhan.”

Selain dari itu Islam mendorong dan menggalakkan manusia seluruhnya berlumba-lumba mencari kebahagiaan di dunia dan akhirat; sebagaimana firman Allah dalam surah al-Qaṣāṣ ayat (77):

**“Wa ibtaghi fi mā ātāka Allāhu al-dāra
al-ākhirata wa lā tansa naṣība mina al-dunyā.”**

Ertinya: “Rebutlah segala sesuatu yang telah dianugerahkan Allah kepadamu untuk kampung akhirat, dan janganlah lupa kepada nasibmu (bahagianmu) di dalam dunia.”

2. Memelihara keselamatan jiwa raga:

Tuhan memerintahkan dengan jelas supaya manusia berusaha untuk menjauhkan dari melakukan sesuatu yang boleh merosakkan dirinya sendiri atau yang boleh membinasakan orang lain. Tuhan juga melarang manusia membunuh diri sendiri atau membunuh orang lain, sama ada dengan nama perseorangan atau atas nama orang ramai.

Apabila kita meneliti sejarah hukum jenayah, maka ternyata bahawa pembunuhan pertama yang berlaku di dalam sejarah hidup manusia, ialah dilakukan oleh Qābīl terhadap saudaranya Hābīl. Kerana rebutan adik perempuannya yang cantik jelita. Sejak dari tarikh itu Tuhan telah mengharamkan manusia melakukan pembunuhan sewenang-wenangnya terhadap sesama manusia. Berhubung dengan itu, lantas Tuhan berfirman di dalam surah al-Mā’idah ayat (32):

(Min ajli dhālikā katabnā ‘alā banī Isrā’ila annahū man qatala nafsan bi ghayri nafsin aw fasādin fī al-arḍi fa ka annamā qatala al-nāsa jamī‘ā).

Ertinya: Berhubung peristiwa itu kami tekankan di dalam suruhan kami terhadap Banī Israel, bahawa sesiapa yang membunuh atau melakukan

kerosakan di muka bumi ini, maka seolah-olah dia telah melakukan pembunuhan terhadap semua manusia.”

Bukan maksud Islam mengadakan hukuman balas bunuh (*qīṣāṣ*) kepada orang-orang yang melakukan pembunuhan, bererti Islam membala dendam terhadap mereka yang melakukan pembunuhan itu, tetapi ialah hukum balas bunuh itu diadakan sebagai suatu jalan untuk membatasi dan mencegah daripada berlakunya perbuatan tersebut dengan secara berleluasa. Apabila manusia tahu bahawa di hadapan mereka ada hukuman yang menanti maka mereka terpaksa berfikir panjang sebelum melakukan sebarang pembunuhan atau kerosakan terhadap orang lain.

Tuhan memberikan ancaman terhadap orang-orang Islam yang membunuh saudara-saudaranya yang seagama dengan firman-Nya di dalam surah al-Nisā’ ayat (93):

(Wamānyaqīd mu’mīnān muta’ammidān fa jazā’uhū jahannamu khālidan fīhā)

Ertinya: “Sesiapa yang membunuh orang-orang yang beriman dengan sengaja, maka balasannya ialah Neraka Jahannam buat selama-lamanya.”

3. Memelihara kesihatan akal fikiran:

Satu-satunya nikmat Tuhan yang paling berharga kepada hamba-Nya ialah akal fikiran. Berbezanya di antara manusia dengan binatang ialah dari kerana manusia itu mempunyai akal fikiran. Dari akal fikiran yang waras manusia dapat memelihara antara yang baik dengan yang buruk; dengan menggunakan akal fikiran manusia dapat mengagak mana yang berfaedah dan mana yang merosakkan.

Dapat menentukan mana yang sesuai dan mana yang janggal, dapat menetapkan mana yang dikatakan perbuatan kebajikan dan yang mana dinamakan perbuatan kejahanan dan keji. Kerana akal fikiran itu sifatnya sebagai penyuluhan di kala gelap dan sebagai pemandu di kala sesat oleh itu Islam memandang berat sekali akan kesihatan akal seseorang. Berhubung dengan soal ini Nabi Muhammad (S.A.W) pernah bersabda: **(Al-dīnu huwa al-‘aqlu lā dīna li man lā ‘aqla lahu).** Ertinya: “Agama itu ialah akal, tidak ada agama bagi sesiapa yang tidak mempunyai akal fikiran.” Oleh sebab itu Islam melarang orang-orang yang sedang mabuk kehilangan akal mengerjakan sembahyang. Begitu pula halnya dengan orang-orang yang gila, mereka tidak diberatkan atau tidak diwajibkan melakukan sesuatu perintah Allah dalam masa mereka sedang kehilangan akal itu.

Oleh yang demikian undang-undang Islam melarang keras manusia melakukan sesuatu yang boleh mendatangkan kerosakan akal fikiran, seperti melarang minuman yang memabukkan, kerana jelas sekali, bahawa dari kemabukan itu manusia tidak dapat lagi menghargai akan dirinya sendiri, lupa daratan, tidak sanggup menunaikan kewajipan dan tugas, lupa kepada tanggungjawab dan bebanan, dan lupa kepada untung nasib dan penentuan.

4. Memelihara kesucian keturunan:

Di negara-negara yang mana masyarakatnya sudah rosak dan ekonominya sudah merosot, di negara-negara yang sudah

membelakangkan norma akhlak dan batas pergaulan, terdapat di mana anak-anak haram (bayi tanpa bapa), terdapat di sana kanak-kanak tanpa ibu bapa di tepi-tepi jalan dan di pinggir-pinggir sungai, terdapat di sana mayat-mayat bayi di dalam tong-tong sampah. Ini ialah dari akibat perbuatan manusia yang sudah tidak mengamalkan peraturan dan tatasusila hidup dan akibat dari perbuatan manusia yang sudah tidak mengambil endah tentang erti kesucian keturunan.

Islam telah menyusun dengan lengkap dan rapi akan peraturan nikah kahwin, Islam telah menentukan batas-batas pergaulan yang boleh mendatangkan manfaat hidup. Di dalam undang-undang Islam telah dibentuk dan ditetapkan hak-hak bagi kedua belah pihak (suami dan isteri), undang-undang Islam telah menentukan kadar kewajipan dan tugas bagi kedua-dua belah pihak di dalam mengharungi gelombang hidup. Juga di dalam undang-undang Islam telah digariskan dengan jelas akan hukuman bagi orang-orang yang melakukan zina atau perhubungan jantina secara haram.

Itu semuanya adalah semata-mata bertujuan untuk memelihara kesucian keturunan manusia, dan untuk mengelakkan dari lahirnya anak-anak haram yang tak tentu ibu bapanya. Di samping itu undang-undang Islam ciptaan Tuhan itu adalah menjamin kerukunan rumah tangga dan memperteguhkan perhubungan yang sihat antara satu sama lain di dalam masyarakat hidup manusia. Islam menganggap bahawa keturunan yang baik dan perhubungan yang sihat di antara keluarga itu, adalah amat penting adanya di dalam satu-satu

masyarakat bagi membina dan membentuk generasi baru yang mempunyai harapan besar di zaman yang akan datang.

5. Memelihara keselamatan harta benda:

Harta kekayaan adalah perhiasan hidup. Islam tidak melarang manusia mencari harta kekayaan demi untuk kebaikan dirinya dan orang lain. Tetapi manusia mesti ingat pintu fitnah akan terbuka dengan seluas-luasnya apabila mereka dengan menyalah gunakan harta kekayaan yang ada pada tangan mereka; ini terbukti di dalam sepotong ayat suci yang berbunyi: (*Al-mālu wa al-banūna zīnatū al-hayāti al-dunyā*). Ertinya “Harta dan anak-anak itu adalah sebagai perhiasan hidup di dunia.”

Islam telah menyediakan peraturan dan undang-undang untuk mempergunakan harta kekayaan yang diperolehi oleh manusia supaya faedahnya dapat disalurkan ke jalan yang baik. Undang-undang itu dinamakan zakat dan cukai.

Di dalam peraturan zakat dan cukai ditetapkan siapakah orang-orang yang wajibkan membayar zakat dan cukai itu, serta sebanyak mana kadar harta yang wajib dikeluarkan? Dari sekian banyak pendapatan zakat dan cukai yang telah terkumpul, maka digariskan pula ke manakah dan kepada siapakah harta-harta zakat dan cukai itu dibayai dan dibelanjakan?

Di dalam undang-undang Islam juga ada dirangkakan cara-cara memelihara harta anak-anak yatim, juga digariskan dengan rapi akan pembahagian harta-harta

warisan peninggalan orang mati. Islam melarang setiap orang-orang Islam mempersalah gunakan harta-harta yang mereka perolehi. Berhubung dengan ini Tuhan ada berfirman di dalam surah al-Nisā’ ayat (29): (*Yā ayyuḥā alladhi nā āmanū lā ta’kulū amwālakum baynakum bi al-bāṭil*). Ertinya: “Hai orang-orang yang beriman. Jangan kamu makan dan kamu gunakan harta kekayaan antara sesama kamu dengan jalan dan cara yang salah.”

Selain dari itu Tuhan juga mengancam keras terhadap pencuri-pencuri dengan menetapkan hukuman potong tangan ke atas mereka.

Tegasnya apa yang telah dirangkakan oleh undang-undang Islam berhubung dengan soal harta kekayaan, dengan apa yang telah ditetapkan hukumannya ke atas mereka yang menyalah gunakan dan mengambil harta kekayaan orang lain dengan jalan yang dilarang, maka itu adalah semata-mata untuk memelihara dan menjamin keselamatan harta benda itu sendiri di samping Islam memandu ke arah menggunakan harta-harta kekayaan yang diperolehi itu ke jalan yang baik dan berfaedah kepada diri yang mempunyai harta itu dan juga mendatangkan manfaat yang besar terhadap masyarakat umum.

Britain ialah negeri yang paling banyak sekali menerbitkan surat khabar. Dalam tahun 1964 sahaja paling kurang sebanyak 182,500,000 naskhah dari Britain diperedarkan ke seluruh dunia.